

四庫全書

集部

欽定四庫全書

雅頌正音卷三

明 劉仔肩 編

危素太樸

臨川人

輓達兼善

大將忠精貫白日諸生攬涕讀哀詞
天胡不隕楊行密公恨不為張伯儀
滿眼陸梁皆小醜甘心一死是男兒
要知汗竹留芳日只在孤舟淺水時

題營丘山房

太岳流芳裔何年徙贛州殊勲思尚父作室表營丘故
國兵戈後空山草木秋穆陵關北路風雪近曾遊

南京別王道士

秦淮卧病惜春陰訪問深知故舊心千里家鄉漸投老
雲山爛漫許相尋

孟昉天偉

北平人

十二月樂詞

并引

凡文章之有韻者皆可歌也第時有升降言有雅俗調有古今聲有清濁原其所自無非發人心之和非六德之外別有一律呂也漢魏晉宋之有樂府人多不能曉唐始有詞而宋因之其知之者亦罕見其人焉今之歌曲比於古詞有名同而言簡者時復亦有與古相同者此皆世變之所致非固求異乖諸古而強合於今也使今之曲歌於古猶古之曲也古之詞歌於今猶今之詞也其所以和人之心養性情者奚古今之異哉先哲有

言今之樂猶古之樂不其然歟嘗讀李長吉十二月樂詞其意新而不蹈襲句麗而不怕淫長短不一音節亦異旁遘冥思朝涵夕詠諧五聲以攤其腔和八音以符其調尋繹日久竟無所得遂輟其學以待知音者出而予承其教焉因增損其語而隱括為天淨沙如其首數不惟於尊席之間便於宛轉之喉且以發長吉之蘊藉使不掩其聲者慎勿曰侮賢者之言云

上樓迎得春歸暗黃着柳依依弄野輕寒似水錦牀鴛

被夢回初日遲遲

勞勞胡燕酣春逗烟薇帳生塵蛾髻佳人瘦損暖雲如
困不堪起舞綳裙

夾城曲水飄香掃城雲髻新粧落盡梨花欲賞不勝惆
悵東風縈損柔腸

依微香雨青氛金塘閒水生蘋數點殘芳墮粉綠莎輕
襯月明空照黃昏

鉛華水汲青尊含風輕縠虛門舞困腮融汗粉翠羅香

潤鴛鴦扇織迴文

疎疎拂柳生裁炎炎紅鏡初開暑困天低寡色火輪飛
蓋暉暉日上蓬萊

星依雲渚濺濺露零玉液涓涓寶砌衰蘭剪剪碧天如
練光搖北斗闌干

吳姬鬢擁雙鴉玉人夢裏歸家風弄虛簷鐵馬天高露
下月明丹桂生華

雞鳴曉色瓏璵鴉啼金井梧桐月墜莖寒露湧廣寒霜

重方池冷悴芙蓉

玉壺銀箭難傾缸花凝笑幽明霜碎虛庭月冷繡幃人
靜夜長鴛夢難成

高城迴冷巖光白天碎墮瓊芳高飲撾鍾日賞流蘇金
帳瑣牕睡殺鴛鴦

日光灑灑生紅瓊葩碎碎迷空寒夜漫漫漏永串銷金
鳳獸爐香靄春融

七十二候環催葭灰玉琯重飛莫道光陰似水羲和迂

轡金鞭嬾着龍媒

張以寧志道

莆田人

賦段節婦

莫磨青銅鏡莫理冰絲絃黃鵠不重行女貞難再妍嗟
嗟未亡人寂寂長自憐百死何足惜但惜負所天嫁時
舊巾櫛不忍棄且捐所天諒有知攜之見黃泉

送鄉友

君家重峰下我家大溪頭君家門前水我家門前流我

行久別家思憶故鄉水況乃故鄉人相見六千里十年
在揚州五年在京城不見故鄉人見君難為情見君情
尚爾別君奈何許送君遽不堪憶君良獨苦君歸過溪
上為問水中魚別時魚尾赤別後今何如

春暉堂詩

上天生萬彙何物能報之所以古孝子感茲蓼莪詩況
母紅芳年手提黃口兒獨於霜雪際迴此陽春熙昔為
斷蓬根今如芳蘭枝母恩雖莫報子職當何為願將一

寸草化作傾陽葵上以承君寵下以報母慈

奉使安南國出都門作

大隱金門三十載幾回馬上聽朝雞如今一吐虹霓志
萬里交州入馬蹄

林公慶孟善

枯蒼人

賦得明月樓贈孫伯融

兩溪合流涵太虛白龍簸弄摩尼珠玉娥捧盤不敢去
孚尹散入仙人居仙人乘雲遊汗漫瓊簫寥寥度銀漢

斟酌北斗依上台玉宇珠宮露如霰鳳臺神馭不可留
春風花開帝王州芙蓉峰前舊時月夜夜長照溪上樓
長沙三絕句

定王臺上關中土西望長安多白雲賈誼才高空有賦
河間博雅更無聞

太傅兒孫多濟美東陽絳灌少聞家欲尋遺井無人識
蛺蝶飛來薜荔花

岳麓道林何處是郡人遙指水西村儒宮佛寺俱無迹

竹樹如麻暮雨昏

程國儒邦民

鄱陽人

客新安用樂秉德韻

溪頭新雨水潺潺行役寧消半日閒
棧影連雲通五嶺柝聲和月出三關
官營白酒初成市客舍黃塵不見山
撫景豈勝懷古意盡言天道似循環

涂穎叔良

豫章人

送董太祝赴濠州

漢祖起豐沛唐公興晉陽方今堯舜聖肇迹自濠梁
蔥鬱佳氣集紛紜才傑良旌旗歟南渡奄有吳楚疆
淮海何漫漫荆山獨蒼蒼分符重牧守組綬出明光
朱轡翼五馬白日曜周行綏緝知有道懷柔喜多方
仁風日以洽桑梓宛相望戚畹車蓋盛侯家珠繡香
從知湯沐邑歌頌聿昭彰嘆我愚朴士忝班聯奉常
迴翔玉闕下白髮愧疎狂典禮懼深曠祝釐誠允臧
分攜詎忍別撫劍苦增傷疊疊文運泰輝輝天業昌
恭期樹佳政遺惠流

帝鄉遂令千載下奚啻比龔黃

送張助教之淮安參謀

長淮據天險南北常要衝職方既已定分閫鎮兵戎時
君奉詔往參佐理從容爰投定遠筆鞍馬如飛龍大將
開國舊英氣生霓虹高談濟時略魚水相和同擊楫祖
生志草檄陳琳工折衝樽俎間庶以樹奇功吾聞中原
地逐鹿角羣雄先當遠斥埃一掃烟塵空勒銘燕然石
早掛天山弓歸來朝明主賞賚恩數隆顧視迂濶士不

當秋生蓬壯哉從軍行頗有前賢風長揖別京闕分攜
苦匆匆遠樹引旌節飛雲送艤舫邊城並大海四境無
驚烽轅門有餘暇書札寄來鴻

送王典籤南豐同知

聖主龍飛日登庸選俊良大廷興禮樂列牧重符章贊
理須才傑謀猷布紀綱講筵承詔旨驛候戒舟航道里
通盱眙風謠逮粵疆政期均賦役恩恃恤逃亡麥秀聞
歌頌桑陰見治粧閭閻豐五袴稿秸送千箱增秩知多

喜施仁願有方自能紓睿眷真足致時康海日輝輝白
江雲冉冉黃分襟嗟欲別看劒興尤長子固遺文在麻
姑舊醞香相思天北極還想接鸞行

送劉典籤赴徐別駕

彭城古要地襟帶控河流雲飛芒碭野天近岱山陬生
俗喜驍暴干戈輒相仇爰從楚漢後英氣鬱難休聖代
暢炎運恩威聞九州徐方既賓服民物在懷柔通守任
賢德贊襄敷令猷蘭臺輟文彥邁征自無留鼓棹出淮

海前旌駐鴻溝招徠省耕稼凋瘵庶云瘳仁化被邊鄙
淵數畢來投坐看河洛外指掌可旋收分潤車輦下深
情苦悠悠同鄉復同館寂寞恒相求臨岐莫可贈舉觴
復能酬惟瞻豐城劍龍氣夜中浮

送友還上清復往盱江并柬吳伯度方壺子

康樂好山水子長眺遠遊陶潛歸故里范蠡泛扁舟四
子趣向異俱諧心所投知君亦瀟灑文采重天球曳裾
輦轂下富貴復何求引棹忽長往飄然若風休丹崖覓

鬼谷龍虎氣雙浮團團桂樹綠
厯覽舊山幽盱眙遠相待麻姑
居上頭紅泉映綠澗玄醴注清
秋還要方壺老復約延陵侯脫
屣塵世外懷珍比前修祇恐明
詔下玄纁賁林丘烟霞席未暖
來覲帝王州

秋夜和黄典籤

遙夜天宇迥開軒坐前楹月華
臨水動涼風滿庭生屢惜光景
至悟茲塵慮清疎星明玉闕委
露浥金莖流序脩將邁嘉朋紛
遠征徵才旅羣彥鳴珮集玉京
文詞資

麗澤笙磬感同聲非比江湖客馳心搖懸旌

酬鄒伯謙見寄

白髮蕭疎忝侍儀夔龍青瑣許追隨禁廬晚退仍分直
宣室春來屢祝釐翔燕遠過雙玉闕流鶯深囀萬年枝
老懷寥寂將何補自有雲泉入夢思

劉丞直宗弼

章貢人

讌章光遠宅

薄暮沐時雨淩朝陟崇山洩雲去復來流水清且閒
寒

裳俯茅屋高論激晴濶層軒既顯敞好鳥鳴間闌開樽
意殊樂劇飲未言還何當脫塵鞅共卧青松間

詠蘭得詠字

春陽麗空谷幽花被芳選歲蕤浥露光蕭散迎風勁質
非荃蕙變根與松桂競錫夢瑞先兆紉佩香逾近亦欲
構新亭於焉樂觴詠

賦落花以宋元憲金谷樓危到地香得香字

英華本天性開謝任年光自是春風改那因夜雨傷低

迴飄綺席荏苒度雕牆翠霧當牕合紅雲匝地香點泥
登燕壘添蜜入蜂房剪綵誇西苑成粧詫壽陽角哀番
塞曲逕遠誤漁郎但使靈根在重看錦樹芳

高齋宴集得枯字

華燈明別館綵月度平湖簪盞欣聯璧杯行類貫珠交
情過管鮑文藻繼楊盧梁苑遊堪並蘭亭興不殊舞迴
香篆裊詩就燭花枯共惜芳春好焉知清夜徂

九日東林寺燕集以來把菊花枝分得把字

季秋屆良辰文宴集蘭若杯行樂酬勸墨妙競揮灑坐
令干戈際頓使懷抱寫感昔生遠思登高睇平野風流
緬龍山雄豪追戲馬采采東籬花何由未盈把

秋日東林宴坐

高秋坐虛館颯然神慮清迴飈踈雨瀟灑集前楹始
欣塵雜遠稍覺微涼生簷鐸遞相答林蟬時一鳴物情
各有適吾生豈無營

采石蛾眉亭

昔從淮海泛歸舟，曾為蛾眉十日留。
翠袖雁行歌子夜，玉壺鯨飲醉清秋。
江山有待仍青眼，歲月無情易白頭。
滿目間愁懷李謝，數聲漁唱起滄洲。

金山寺

孤峰宛若巨鼇簪，橫絕中流翠色深。
勢與波濤相上下，影隨魚鳥共浮沈。
椒門風起雲翻墨，瓜步潮回月湧金。
擬汲中漈觀瘞鶴，維舟三日阻登臨。

題高麗貢使還卷

大明天子混華戎又報三韓使節通
錫命新頒如斗印歸帆穩駕落燈風
衣冠復覩唐人制樓櫓何煩漢將功
翹首金陵天咫尺扶桑日上五雲紅

文軌初同泰運開藩邦傳令動雲雷
三韓舊控元菟險重譯今隨白雉來
使節秋風辭殿陛樓船春水泛蓬萊
金章珠翟承殊渥專對從知得俊才

題徐唐臣畫

招提隱翠微一逕入林霏松風清麈尾
雲影落銖衣脩

然絕塵想日暮澹忘歸

遙空度雲影高樹臨清流鬱鬱千嶂暝蕭蕭羣籟秋援
琴坐磐石或恐是巢由

同俞自安泛舟南湖寄龔所立

高秋留別墅亭午泛寒流未結巢由社還同李郭舟波
光迎日動雲氣挾山浮為問乘槎客何時賦遠遊

題孫子讓山水

斜日在松杉千崖暝色酣山藏五柳宅路轉百花潭亂

石明蒼玉遙峰露碧簪終希陪妙躅來此脫征驂

題湘中袁氏先隴瑞芝卷

湘水清無底湘山高入雲曾聞三秀草表瑞百年墳馬
鬣瓊光覆牛眠紫氣分兵戈嗟阻隔春雨長榆枌

題鮑典籤芳塢隱居圖

幽勝似仙家緣雲石磴斜陰崖留積雪晴樹亂霞寺
遠時聞磬溪深未沒槎抱琴來谷口多是識桃花

北極院紫霞樓

危構憑虛切太清紫霞如綺散前楹萬年佳氣通函谷
五夜神光動赤城鶴駕凌風霓旆遠鳳笙吹月羽衣輕
崆峒對面三千丈我欲因之問廣成

題陳氏中靜軒

為愛城東處士家竹門藤巷寂無譁清溪時集忘機鳥
喬木來巢返哺鴉牕下晨香燒栢子甕頭春酒釀松花
年來我亦嫌紛擾擬卜南鄰度歲華

過舒州弔青陽余先生

指揮戎馬駐江瀕南紀安危寄一身闔室同歸追李芾
孤城百戰繼張巡河山莫誓勲庸盛金石徒傳翰墨新
漂泊風塵愧何似空餘涕淚滿衣巾

除夕分韻得馬字

歲事聿云徂年華浩如寫良宵集蠻宇文宴盛儒雅絳
蠟搖夕輝清醕溢春筭聯詩效韓孟擣藻軼揚馬歡樂
詎終極襟懷共瀟灑明發慶始和相期錫純嘏

熊鼎伯穎

臨川人

題營丘山房

築居臨貢水攬勝擬齊封
燕翼當時計鷹揚百世宗
喬林空翠濕華屋曉雲重
預卜非熊兆多應晚歲逢

題江岫圖

雪渚水初生寒雲落雁聲
片帆天共遠南望總關情

吳彤文明

臨川人

峽口晚泊四首

川路渺無際揚帆溯流波
征人嘆遲暮舟子方笑歌
去

去日將夕維舟松上蘿坐嘯微雨歇洲渚落花多

翠壁隱殘照滄洲生夕陰鷗鳥忽飛去幽幽春水深涉
險念先訓觀風推聖心功名覺遲暮蕭颯二毛侵

日落潭水綠松間聞子規征途一萬里江月每相隨王
事有程度人心多嶮巇周詢庶有濟驅涉不知疲

江烟歛初夕華月入我舟坐久風露集微寒侵敝裘戍
鼓動邊思擢歌縈客愁漸聞湍響急度峽是歸州

蘭以權世衡

西河人

題東峰驛用梁郎中韻

香浮綠蟻山中醅磁甌遠勝清蓮杯不用笙箏為佐酒
松風一派從天來半酣走筆寫新句飛龍滿壁真雄哉
故人騎鶴幾時去空庭寂寂官梅開

題越上人臨清軒

塵境不可居飛錫傍流水高檻接空溟新綠渙如砥孤
影過寒鴻悠然逝羣鯉所以川上人於焉契斯理卜築
擬幽棲兼足浣塵耳愛此春雨餘波光淨禪几

題劉郎中雲海蓬萊軒

誰信劉郎是謫仙，行軒不減洞中天。
蛟龍噓氣成樓閣，島嶼無波見市廛。
鶴到詩壇通遠信，人看棋局惜流年。
卜居自愛三山好，贏得烟波滿目前。

酬寶秀才

旅宿三秋依古寺，御溝斜月似秦淮。
欲憑征雁傳鄉信，却厭鳴蛩感客懷。
剪燭且為談磊落，敲棋還可助俳諧。
休嗟行篋空如洗，猶有黃金半股釵。

延碩上人

村深無客到今日喜公來
卓錫當松逕談禪坐石臺
晴看江鷺浴暖愛野梅開
休笑無清供溪頭水一杯

張紳士行

齊郡人

題畫二首

高樹漏疎雨滴瀝下銀塘
美人捲簾坐銀鴨自添香
風吹綠荷葉正見宿鴛鴦

閒門綠樹老華池芳草生
偶隨蝴蝶起獨自下階行
何

處垂楊院春風驕馬鳴

湖中玩月

銀波千頃照神州此夕人間別是秋地與樓臺相上下
天隨星斗共沈浮一塵不向空中住萬象都於物外求
醉吸清華遊碧落更於何處覓瀛洲

送勤上人歸靈鷲山

靈鷲禪房我所思可堪春晚送勤師亂山啼鳥烟霞裏
一路落花風雨時定有猿看牕外果應知苔護壁間詩

門前有徑通三竺欲向中天採石芝

題江岫圖

烏衣巷裏東風老蝴蝶飛來滿芳草美人春夢隔天涯
十二巫山眉不掃巫山巫峽江水新烟波渺渺江南春
鴛鴦不識橫塘路鸚鵡牕間呼向人青燈誰共官曹宿
雪楮雲毫吮晴綠太常春甕碧霞沉六曲屏風對銀燭

楊嗣文舉

金陵人

酬孔秀才

達人樂高蹈寒士耽遠遊遠遊欲何之禦冬無重裘
栖道路間四顧誰與謀溫言忽相慰慶愜復焉求三復
緇衣詩調高安能酬薄言寫心曲終覺懷慚羞

春遊次韻

白日諒難羈流光遽侵尋春風萬餘里觸景愁我心
出門將何之高步凌嶇嶇欽纍纍丘塚間古木殊陰森
昔賢日已遠朱瑟尚遺音千秋百歲後有酒不可斟
傷哉薤門語感之淚霑襟榮名安足羨行樂須在今
夙興聽鴻

鴈噉噉尚哀吟

遊廣教寺次李生韻

勝日款禪宮蒼苔印屐蹤雲間聞梵語烟外聽齋鐘樹
列千年檜林深百尺松明珠光錯落幽壑舞驪龍

題徐熙桃花鸚鵡圖

海上紅雲日日新碧鸞無夢識芳塵金籠不鎖閒鸚鵡
占得東風一段春

題李得瞻壁間相看不厭圖

牕前圖畫勝玄關怪石長松九夏寒寄語山靈休厭客
清風明月好相看

寄于清叔二首

暖沁香篝宿火溫絳紗紅燭照黃昏自憐不廢千金夜
帳底吹笙倒玉樽

梅花亂落雪紛紛兩袖東風酒半醺春月滿堂歌舞散
高情渾欲夢梨雲

雅頌正音卷三

欽定四庫全書

集部
雅頌正音卷五

四

詳校官中書_臣丁崇祚

助教_臣常循覆勘

總校官知縣_臣楊懋珩

校對官編修_臣盧遂

謄錄監生_臣詹師賢

馬瘦足力短士貧心志窮相如豈不偉滌器難為容憶
昔擅詞賦左右能生風黃金資費用意氣自填胃迤邐
勿復歎命達皆稱雄

流水日夜流厚土胡不盈人生自不已四運有相承達
士識物化昧者徒營營蕩蕩晨風來悠悠天宇清會當
撥俗惡聊復從吾生追呼心所歡置酒坐中庭忘言勿
復辯觴盡還復傾

有酒既已飲茲愁仍復生何如長戚戚憂患有相并日

欽定四庫全書

雅頌正音卷四

明 劉仔肩 編

黃肅子邕

豫章人

詠懷七首

少壯好遊覽不知中道憂方茲懷故土眷此成淹留
員闕蔽朝暉玄雲陰以浮徘徊當永夕嫵婉將焉述棲鳥
翔不息鳴蟲亦啾啾人生無定止卒歲何能休

月迭更代何能久安榮唯當委薄質允矣將微誠君心
苟有察婉孌餘芳馨誰謂在咫尺邈若萬里程明明亮
自適靡靡詎遑寧

中園桃與李灼灼有奇花彼姝將折贈遐思在天涯此
花傷天折為歎女容華盛年難再遇豈得長修姱夫子
新好合不能思故家欲因歌此曲此曲令人嗟

匣鏡三十年塵暗不復治停食且不寐所思知為誰遊
子不復返眇在天一涯綻衣終當組道遠何能為明明

天邊月三五入中閨念與子懽愛不得同光輝寤言相
與共既覺將何依

所適寡儔侶任性不自知輕心隘寰宇高視誰能羈荏
苒逾立年茫昧竟何為乃知聖賢語不離矩與規塊然
枯朽質雕琢嗟良師

白頭吟

長絲弦聲緩短絲弦聲急長短苦不齊抱取向卽泣明
明皓月三五圓缺念我所思中道而別噉噉雲中鴈北

風聲烈烈願寄一行書與郎相訣絕泰山高鬼鬼海水
不見底妾心終不移研山枯海水

短歌行

來日苦少去日苦多人生不滿百痛當奈何當復奈何
不如沽美酒置此高堂上與君長笑歌峻坂無停車急
川無停波不如沽美酒置此高堂上與君長笑歌人生
不滿百當復奈何痛當奈何來日苦少去日多

長相思

望歡城南頭覽取別時路路邊有深井井上有雙樹樹
有東西枝枝葉盡相附去年東枝榮今年西枝悴年年
望樹枝樹發行人歸

仙人篇

翩翩騎白鹿言上泰山頂俯觀浮世中不見百年影道
逢古時人綠髮被兩領授我採藥訣延年保壽命我聞
再拜跪問是何方求撫我挾我肘與我上天遊天上多
桂樹枝葉何修修折取忽盈筥馨香霑我裘何因入君

袖道路長悠悠

李質文彬

廣東人

王臺驛亭子

春去臺空迹已陳
危亭傑出澗之濱
清溪繞屋可濯足
好鳥隔江如喚人
明月委波金潋灩
青山帶雪玉嶙峋
桃花流水非人世
或有漁郎來問津

和喻侍儀退朝韻

玉笋班頭左掖傍
叨陪鴛鴦接清光
羨君藉藉青雲彥

金少卿八十二
卷四
媿我蕭蕭白髮郎

龍樓五鼓漏聲催
暘谷寅賓日
馭回稽首九重天
咫尺
五雲低駕六龍來

彤庭樂奏殿前歡
侍宴歸來興未闌
擬頌河清歌帝德
願言聖壽萬年安

吳植子立

嚴陵人

寄孟兼張國錄二首

辟離於樂地
發輟稱奇瓌
鐘鼓一朝饗
冠帶如雲來
橫

經闡聖謨稽古育羣材菁莪興詠歎奎壁煥昭回皇情
敷文德昌運自天開抽毫贊鴻業明良何盛哉

昔別意何長重來歲華改沈憂誰與娛懷人邈江海褰
裳涉汀洲秋風被蘭茝日夕零露繁芳馨為誰采嘉會
諒難并良辰詎容待思君如明月夜夜望光彩

劉汝弼還自海上相與談詩於玉兔泉之西齋如
平生懽懽予有關陝之行不得從容游衍賦此留
別

羨子觀滄海歸來及素秋相從白下飲絕似洛中遊價
重連城壁才誇五鳳樓明朝隔江漢相望兩悠悠

留別張孟兼

故人昔隱仙華山高卧白雲終日間我攜清都綠玉杖
相與嘯傲烟霞間一朝忽被徵書起姓名直入明光裏
清時冠帶圜橋門濟濟橫經臨辟水坐擁皋比三載餘
石室仍紬太史書平生直氣橫秋嶽秉筆一字誅奸諛
邇來峻擢儀曹上千載皇風迴揖讓要知制作魯諸生

元是傳經舊劉向
塞予泉石是生涯
白頭受薦來京華
相逢共醉金陵市
一官却種河陽花
人生離會良可惜
已覺形容非昨日
馬頭萬點蜀山青
回首秦淮烟樹夕
丈夫才氣古所難
去去有冠冠莫彈
郢筒酒熟寧辭飲
飯顆詩成得細看
憐君最是知予者
慷慨高歌起中夜
葛令丹砂或可求
王喬飛舄還堪借
他時一笑蓬萊巔
碧桃亂發東風前
還將玉管吹明月
叶以雲間紫鳳篇

題蘆花被圖

秋風吟就蘆花被一落人間知幾年澤國烟波惟見畫
詩翁毛骨久成仙高情都付滄洲外舊夢長隨白鳥邊
日暮江空轉晴雪至今惆悵釣魚船

秋水軒

秋水軒前秋水清美人曾此濯冠纓芙蓉隔檻零露夕
鵝鵝滿汀殘照明洛浦佩環誰共解渚宮賦詠謾多情
滄浪歌罷無人和何處蒹葭月又生

過南湖戲折藕花

秋日南湖戲採蓮鴛鴦飛上木蘭船一聲白紵知何處
無復閒情似少年

劉崧子高

廬陵人

題馬圖

天馬西來掠西極萬

闕

躡雲入紫塞秋迴玉頰明

黃河夜渡拳毛濕高

闕

不敢騎拄策却立當前墀

半垂絲韁斂青草明月

闕

鞍趁班早

織女吟贈黃進賢

憶昔束髮初嬌倚雲錦機折花事戲劇笑詫身上衣一
從十五時學向機中織絲短愁苦長梭緩心轉急永夜
蘭燈懸洞房門前梧葉零秋霜天寒手凍絲緒亂絡緯
悲啼金井牀春花更疊黃金縷花底青鸞蹴烟霧東風
何日天上來擬奉瑤池宴歌舞十日滿匹恒苦遲一夕
停梭生網絲持刀沈吟剪秋水粉泪欲落愁風吹遠懷
素心人邈在千里道何由托交歡持此永相保東鄰小
姬昔同年至今盛飾為母憐幾回月高鳴杼軸正是他

家夜彈曲

雙翠軒詩為劉汝弼賦

雙翠軒聞在鄱陽萬斛山下宮亭湖水之東偏疎牕碧
戶照雲日美人在望何娟娟問之此軒奚以名云有雙
檜者乃是昔人手植之所成百年雨露見翹蔚萬井烽
火遺崢嶸編氓父老共歎異摩娑重說當年事屋角仍
瞻秀色

闕

更喜清陰庇宜爾劉氏賢子孫卜築

闕

幾千尺但見旌幢矗矗並立

欽定四庫全書

雅分正音
卷四

當高門

闕

宿雙檜畔願親強健長相保

闕

憶我往年湖上過東望鄱山千翠螺

闕

明月正湧黃金波此時懷君雙

闕

訪仙島題詩遠寄軒中雲歲宴端期拾瑤草

秋夜紀夢

美人遺我雲錦書問之所因吾故居章江千里波浪濶
七月舟楫來何如書中字字光凌亂一讀中腸一回轉
青鳥西飛不可招涼月斜風動河漢

秋夜詞

林鳥夜啼金井西蟋蟀在戶聲相齊中天無雲白露下
漸見梧桐青葉低幽居此時愁獨曉蘭燈雙照蛾眉小
歌聲恐逐回風高掩抑冰絃破清悄絃中語咽心自傷
低頭却看明月光羅衣一夜惜顏色庭草明日霑秋霜
甘心霜下草祇在堦庭好不作白楊花飛飛洛陽道

芳樹篇

芳樹好容華深深映狹斜二月三月時千枝萬枝花夜

舞留瓊佩春遊礙寶車折榮遺遠者含思獨咨嗟

送周德剛歸九江並柬其兄仲常

君家伯仲才名盛賤子東南道路窮往昔永懷千里別
只今謾想一樽同蒹葭水驛青鳬雨落木山城白鴈風
歲晏林居最相憶九江消息若為通

秋林圖題贈曠伯達

迴風蕭蕭吹北林行雲冉冉生夕陰天寒雁去洲渚淨
秋雨龍吟波浪深飄泊共憐今日興畫圖因見古人心

幾時螺子青楓下深結茅堂更遠尋

牛諒士良

東平人

秋林高士圖

林皋木葉下江潭秋水生靈飈蕩陰霧落景涵虛明手
結芙蓉佩目送孤鴻征冲襟契玄賞招搖千古情

淦泉詩為劉明善賦

鄂渚通金匯枝江入漢流珠光宵射月雲液晝涵秋遠
脈趨南紀靈源接上游潤分滋蕙浦香汎采蘋舟喬木

承深澤名公屬舊遊觀瀾探妙理育德繼前修浩蕩風
雲會飛揚歲月周使輶輝翥鷺鄉夢隔盟鷗酌河詩方
美投竿志未酬賜歸看晚節佩玉映芳洲

畫梅

梨花雲底路參差折得春風玉一枝南雪未消江月曉
欲從何處寄相思

紅梅

隴頭人未來江南春幾許惆悵玉簫聲吹落胭脂雨

顧觀利賓

京口人

挾彈圖

窈窕雲生谷蕭條風滿林華裾因駐馬翠樾正鳴禽似
亦尋幽致還能愜賞心明朝五陵道飛鞚落花深

為卜者馮生題山居圖

賈卜生涯薄心猶逃市朝欲歸盤谷隱不受小山招種
樹環溪閣開門隔野橋桃花春水漲漁客每停橈

夜坐

嘖嘖候蟲鳴
唯唯寒雁過
擊柝警荒戍
然燈照孤坐
風從林外來
月向牕間墮
悲歌清夜發
激烈誰其和

芙蓉野鴨圖

欲採芙蓉寄遠情
秋風江上錦為城
閒愁總付東流水
來看鳬鷺弄晚晴

為袁一無題扇

月中仙子種娑羅
樹底遙山隔絳河
吹落秋聲向何處
紫簷牕戶晚涼多

秋院竹木小景

庭柯日日減秋陰
翠袖輕寒漸不禁
拾得堦前大梧葉
戲拈湘管寫微吟

梨花睡鴨圖

昔年家住太湖西
常過吳興晝畫溪
水閣筠簾春似海
梨花影裏睡鳬鷺

吳去疾

字同安慶人

春日雨中示友人

二月已過三月臨茅堂寂寥常雨陰梅花白白落已盡
楊柳青青渾未深何日新晴出山郭及時行樂稱春心
應須載酒窮幽賞爛醉扶肩過竹林

酬李卿

李卿好客天下無日日相過惟酒徒眼花耳熱不復醉
瓶罄樽空還復沽去年解后留君第七日踈狂淹客途
近有新詞來寄我灑然清興滿江湖

除夕

一暑一寒時又改相看相守過今年
椒柈送酒來深夜
銀燭開花向暮筵物色漸隨新節換
老懷偏為舊時憐
獨慚五鬼窮仍在虛有錢神論可傳

徐尊生大年

關陵人

佩刀行

并序

金華之永康有山曰雲巖拔起天半有巨舟藏壑中舟
尾翹出如蠶一釘墜崖下野僧得之以遺張君孟兼孟
兼製為佩刀銛利特甚尊生為作歌

神人藏舟半天裏絕壑豁研露舟尾錚然有物墮中宵
八觚稜增長尺咫野僧拾之歸張公化為夭矯蒼精龍
不知何世何年閱奇氣剝犀斷虎一旦生神通魑魅却
走妖邪空張公佩到蓬萊殿天上羣仙驚未見青絲綵
懸白玉環當晝孤光搖冷電為君淬厲向盤根縱有青
萍何足羨他年辭榮歸浙山莫行金華赤松間精靈感
會霹靂響便恐飛去無時還

吳雲友雲

義興人

題魏仲遠見山樓

百尺樓居盡日開
四圍山色送青來
平湖霽雨鷗波靜
畫棟春風燕子回
天末烟霞連海岱
座中賓客對蓬萊
登臨豈特如王粲
擬欲披雲接上台

送李民瞻侍郎宣諭陝西

侍郎將命出金鑾
一路傳呼遠近懽
關內官曹迎使節
秦中父老識衣冠
雲開太華三峯秀
水遶黃河九曲寒
寄語渭川千畝竹
西風還解報平安

題

闕

送別圖

江山天共遠無限別離情人去長亭在空餘落鴈聲

秋夜二絕句

中秋不見月相思情未絕倦對讀書燈風來自吹滅
寒光滿天上明月在水中照我雙塘蓮葉葉生秋風

鄭沂叔魯

姑蘇人

題安慶府城樓

高閣崔嵬倚碧空五雲深處望江東勢牟太華羣山伏

地壓長淮亘古雄
桂子影團千里月
梅花聲斷五更風
從今鐘鼓分明聽
過客爭誇太守功

至淞江

路入雲間去青雲
上錦袍水連三泖
濶山擁九峰高白
鶴嗟何及鱸魚興
亦豪淒涼千載事
釀酒向亭皋

題山居圖

杜陵西上浣花莊
茅屋低低在石傍
最是可人三月節
一山春雨茯苓香

吳伯宗

字同金谿人

賦得羅漢洞送陳宗進歸會稽

古洞根石壁嵌空隱崔嵬聞昔有異人拄杖曾一來靈
跡已緬邈洞門閉青苔枯木寒未花千年待誰開屬茲
休明運百里紆良才德星麗中天移影照蒼厓鸞鳳詎
棲枳覽輝謾徘徊早見丹穴雛志欲凌九垓定省方繾
綣歸期忽相催還轅過湖口驛路隨縈迴吾知青雲興
却繞蓮花臺風高墜落木歲晏舒寒梅明登會稽頂想

像遊天台臨期重回首兩地心悠哉

題李氏棲碧樓

唐有謫仙人風骨特高妙晚愛棲碧山間心付登眺桃
花與流水目擊領其要遐觀窮有象幽討入無微不知
誰相問但覺遺一笑聲落天地間松風紫鸞叫諸孫企
高躅異世頗同調瓊樓梯空青銀榜生光耀予亦愛其
人臨風畫長嘯

余氏山南小隱

萬疊碧山紆維南好隱居竹深清野濶林響夜牕虛古
巷多回轍匡床剩貯書忽聞歌調起白石意何如

周子諒

字同廬陵人

讀子書作

學館坐無事故書聊復看披文既薈叢尋義亦泮渙趨
前後已逸顧舊新輒竄萬言雖畢陳一理竟未貫往往
未終卷心目已憤亂置書歛視聽境地甚澄晏易書詩
春秋辭簡義亦煥賄書言五千隱約可徐玩奈何百家

言磊磊疊几案綿延比葛藟根遠益纏絆遂令矜名士
摹放如習幻雕刻出葩卉綴緝呈組纂悅目效女美飮
口匪芻豢推以合身心宜若霄壤判吾欲盡其文掇取
歸爐炭觀心勝觀書矢矢坐夜旦濯穢來澄清磨昏出
璀璨綿綿春雲舒炯炯秋月爛詠歌成文章昭倬比雲
漢往者予弗及來者予何憚作詩示朋曹無乃駭童叟
贈別郭元達二首

時雨布嘉澤林塘有餘清端居方自怡子有千里行問

子行何為豈緣好爵嬰守道以時動所念在蒼生風雲
浩茫茫山海日震驚撥亂需大猷寧徒阻甲兵溫溫國
之良蘊義富且精高歌起林莽抗議登明廷勿懷一身
計勉樹千載名娒娒中林下小廉何足稱

黃鵠乘天風飄飄忽高翔飛飛巢林鳥刷羽情內傷豈
無凌霄志六翮不得長念子平生意相送以徬徨勿言
易為別明發各一方悲來解佩劍為子復進觴且為遊
子歌歌詞何慨慷慨疾風吹征颿旭日在衣裳自古有離

別各言慎行藏

白紵詞

井梧墜葉聲如雨
轆轤夜靜莎雞語
西里佳人怨薄寒
惆悵燈前歌白紵
白紵新時白若霜
象牀開合秋水光
製成只恐香塵污
衣著偏宜九夏涼
西風乍入羅幃裏
數點清塵不禁洗
競開篋笥試新紵
舊服拋捐那復理
嗟爾白紵怨勿深
憐新棄舊他人心
願將貞白永相保
今年卷却明年討

秋風詞

秋風乍高江葉飛秋水欲落江聲微誰家寒事促砧杵
別館清霜侵客衣旅遊漸倦黑貂敝鄉信不來南鴈稀
秋江搖落人當歸秋江搖落人當歸

戈錫仲京

鎮江人

桐孫曲

崑山玉軫蒼梧雲膠弦漆水生古春垂楊飛絲小鶯舞
海上桃花響紅雨仙人鸞尾掃寒空環珮行烟度湘浦

驚猿墜石秋雲裂鐵網珊瑚碎明月臨邛病客看文君
鬢影星星半成雪

淶水詞

紅船壓秋綠水澀藕根香昨夜龍沙月鴛鴦夢薄霜秋
彎掃蛾翠生色染絲黃為報潯陽客行雲不下堂

送陳伯淵教授歸沔陽

廣文金閨身臺城一相見壁素懸青燈花蟲蠹書卷去
買沔陽船抽帆上秋水別路折垂楊歌聲斷腸起花落

烟江口青苧新槽酒索寞辭官資還家奉眉壽

春曉詞

鴉啼細柳東方明井上轆轤牽水聲花奴滿堂開翠屏
銀爐燒麝素烟輕西原落落秦川路白馬花鞭幾時去
落花昨夜飛成團蝴蝶歸來及春暮

菖蒲詩

溪毛剪雨森森玉細葉鋪香晚花綠崑山石筍瘦如龍
銀沙九節種春叢高堂坐客青雲氣鳳羽翹烟散花机

莫教秋質易闌珊
日日銅瓶換芳水

寄劉彥炳

征旆遙分苑路西
馬蹄春去弋陽溪
相思欲和烏啼曲
一拂瑤弦意總迷

題野塘秋景

芙蓉秋色滿銀塘
白鷺雙飛下晚涼
記得採蓮看越女
醉騎驕馬映垂楊

王敬中

字同四明人

送商公禮赴溫州

城東飛花點客舟
花間春雨啼鉤輈
風塵顧我獨青眼
湖海送君俱黑頭
容成洞口明月好
白沙渡傍蒼樹愁
雲山在望五百里
何日相從汗漫遊

南湖齋居寄友人

山寒夜透青綾被
海日朝明白玉珂
隱几不知春色晚
停杯驚見落花多
旃檀香裏來僧梵
楊柳橋邊起棹歌
咫尺湖光不相見
竹牀琴調近如何

贈友赴廣州

烏府才華爾最賢
北風又上孝廉船
篋書尚有陳琳檄
行李那無子敬氈
帆影曉分湘浦月
珮聲晴拂隱山烟
壯遊萬里須乘興
好著聲名到日邊

僧似杞楚材

鄱陽人

寄題劉氏雙翠軒

兩株擁秀立階除
絕勝蘭苕畫不如
畫影並移當几席
嵐光相與落圖書
羽衣霓袖臨風舞
鴉髻雲鬟帶曉梳

珍重二難孤未得更栽連理伴幽居

題米元暉山水小景贈陳原貞別

江頭雨足春水生江上青山烟樹暮扁舟明發去如飛
目斷征帆入蒼霧

僧來復見心

豫章人

車駕臨蔣山於崇禧寺賜高僧齋議設無遮會謾
成口號二首

崇禧寺前風日清鑿輿遙迓定鐘鳴山林有道禪王化

天地無私荷聖情
婁約入梁終應詔
惠琳居宋豈貪名
金山重感千年夢
願濟幽靈答治平

祇園花雨曉吹香
手綰袈裟近御牀
闕下紫雲隨雉尾
座間紅日動龍光
金盤蘇合頒殊域
玉盃醍醐出尚方
稠疊屢承天上供
每慙無德頌陶唐

桂隱為日東楚上人賦

上人種得桂扶疎
好似淮南隱者廬
金粟滿林秋富貴
碧蘂漙露夜清虛
月中子落翻經後
風外香飄起定初

掛錫樽桑看秋色虛遊絕勝廣寒居

同朝天宮道士朝回口號

羽仙飛佩曉泠風禪子金襴映日紅
共祝太平朝帝闕蓬萊兜率五雲中

午陰初轉御橋灣齋退從容出九關
天上好風重送喜鑾輿明日幸鍾山

僧宗泐季潭

天台人

江南曲

泛舟出晴溪溪迴抱山轉欲採芙蓉花亭亭秋水遠心
非檣上帆隨風豈舒卷但得紅芳遲何辭歲年晚

送瀾法師歸雲門

故山從此去何日更相逢獨倚千峰閣間聽六寺鐘石
林流水繞蘿徑落花封會有東歸興來尋雲外蹤

朝來

朝來暑氣清疎雨過簷楹徑竹歌斜處山禽一兩聲間
情聊自適幽事與誰評几上玲瓏石青蒲細細生

贈日本僧

海外趁商船江東住幾年
華音雖已習鄉信若為傳
一鉢隨時飯諸山到處禪
涼秋明月夜夢渡石橋烟

道中

青石懸蘿花冪冪綠田分
澗水泠泠人家深住黃猿塢
漁網高張白鷺汀

僧廷俊用章

鄱陽人

次孟天暉南山雜韻二首

南湖三月水如天
共愛風流賀監船
若道沃洲還可買
數椽高卧白雲邊

日上南山春霧開
雨餘鏡水綠如苔
風流賀老今塵土
短棹何人載酒來

僧懷渭清遠

豫章人

畫梅二首

瑤臺夕承月
玉砌晚凝霜
花映含章發
枝橫禁籞長
春風似相識
偏惜壽陽粧

折得江南春，悵望洛陽客。
悠悠歲年暮，浩浩風塵隔。
道遠勿相思，相思減容色。

次孟天暉雜詠二首

賀監湖邊草色春，秦淮江上柳條新。
山川是處堪行樂，晴日風光思殺人。

暮春三月風日妍，亂折花枝送酒船。
西嶺山光青浸水，南池柳色綠生烟。

僧子樵用堂

四明人

思親

憶別長汀十二秋
羈孤江左謾增憂
寒蒲雨足橋南浦
新筍春生舍北丘
破衲一身雲渺渺
寸心千里水悠悠
鄉書莫寄天南鴈
堂上慈親已白頭

雅頌正音卷四

欽定四庫全書

雅頌正音卷五

明 劉仔肩 編

孫炎伯融

金陵人

寶劍歌

寶劍光耿耿佩之可以當一龍只是陰山太古雪為誰
結此青芙蓉明珠為寶錦為帶三尺枯蛟出冰海自從
虎草裹干戈飛入芒碭育光彩青田劉郎漢諸孫傳家

惟有此物存匣中千年睡不醒白帝血染桃花痕山童
神全眼如日時見蜿蜒走虛室我逢龍精不敢彈正氣
直貫青天寒還君持之獻明主若歲大旱為霖雨

題好溪圖送憲使黃繼先

君乘馬望君來枯蒼下君乘舟望君來好溪頭好溪水
生玳瑁魚好溪水生明月珠好溪水生青珊瑚使君來
此月再樞惟飲此水無一需使君之清水不如臨別贈
君青絲轡隨君馬頭行萬里相思之心有如水

龍灣城

龍灣城壯如鐵城下是長江城頭有明月月色照人心
不移江水長流無盡時

迎日詞

鳳炙兮麟脯瑤席兮桂俎樂萬舞兮如雲吹笙竽兮龍
二女干子子載以輿六蒼虬歷天衢雲霏霏兮夜未艾
執長轡兮久相待

奉使還途中聞東征捷音

南來萬馬淨邊塵
街壁歸朝盡大臣
城上玉繩浮婺女
帳前銀甲擁天人
出師已略扶桑國
奉使須通析木津
遂有江黃幕中夏
可無書檄諭全閩

贈黃鍊師

留侯弟子有初平
九歲從師住玉京
天與數書皆鳥跡
家傳一劍是龍精
瑤池桃子無消息
海水桑田又淺清
我為紫芝歌一曲
夜深相答洞簫聲

李克正

一名頤 豫章人

送呂君采史北平

八月烏啼海子橋南來使客下青霄雲埋石室丹書在
日落延秋翠輦遙麟史未全歸聖代龜文猶得認前朝
詞臣載筆需文獻莫遣回車久寂寥

送劉汝弼歸鄱陽

楓葉江天爽氣高石頭送子上輕舸遙看一鴈歸彭蠡
秋水偏宜濯羽毛

蘇伯衡平仲

眉山人

雜詩二首

富貴每多合貧賤恒見疎自我罷朝請於今四月餘平
生交親者對之良可吁深情劇山海厚貌彌勤渠微君
仗高誼何以慰窮途豁達見肝膽疊疊忘其劬君雖今
人居君乃古人徒

還家信可喜還家亦可悲喜全骨肉親悲與故舊離吳
越各異縣關河復間之明日一樽酒何由共歡持念念
不忍別戚戚臨交歧童子笑謂我悲戚亦奚為自非形

與影安得長相隨

為呂仲善題江岫圖

尚書懷抱絕瀟灑揮毫往往凌董馬平生一筆頗自珍
數尺新圖為君寫齊山遙接吳山青淥波萬頃孤帆征
東風綠遍汀洲草總是旗亭離別情一在江南一江北
別情浩蕩嗟何極正如江上之淥波縱有并刀那剪得
當時已足令人愁而今况復隔羅浮掩圖却上高臺望
但見遠海連天流暮歸朝出與誰侶瘴雨蠻烟結悵楚

斑枝花落鸚鵡飛苦竹叢深鷓鴣語

題劉汝弼東源小隱圖

東源山水好聞說似終南種黍都為酒誅茅小作庵過
門人問字看竹客停驂亦有幽棲意遲歸我獨慙

呂復仲善

章貢人

題桃源圖

人蹟不到處鳥聲春晝閒桃花渾勝錦雲氣或成山仙
子知名久劉郎何事還至今橋畔路猶聽水潺湲

題東林小隱圖

茅屋青山麓
芸牕綠篠陰
小橋通曲水
疊巘出疎林
門巷車塵遠
桑麻夜雨深
別來江海上
誰與繼清吟

次劉汝弼東蕭子所詩韻

不見劉郎久
相思愁緒多
偶然得佳句
頓若起沈疴
春綠王孫草
泥香燕子窠
皇都同作客
慰藉可能過

題方壺蒼山秋意圖

昔遊華蓋仙人掌
萬疊芙蓉紫翠生
猶記月明聞鐵笛

人間無處著秋聲

章貢聞柝

翠玉樓前聞擊柝
離情應向此中分
遙知孤枕金陵夜
還憶今宵月下聞

唐肅處敬

會稽人

孤鴻吟美夏節婦

冥鴻失其曹
孤飛自磬磬
嚴霜殺野草
烈烈北風高
豈無雲間行
肅肅齊上下
顧之非吾匹
吾匹久以寡
生有

孤飛影死有孤飛魂孤飛竟生死誓不入他羣

陶誼漢生

天台人

送魏太守之官姑蘇

東吳父老候麾旌
兒蓋朱轡五馬榮
名郡暫須煩魏相
諸生久恨失陽城
麟符剖玉君恩重
燕寢凝香吏牘清
指日徵黃下丹詔
又看環珮入承明

題嵩高春曉圖

嵩高千仞青崔嵬
倚空壁立何雄哉
東瞻紅日海底出

西引黃河天上來山君翠蓋弭絳節仙館瓊漿分玉杯
我思從之不可得忽見畫圖雙眼開

題詹吏部所藏方方壺畫

方丈蓬萊海上山瓊林琪樹杳難攀玉笙倚鳳真仙下
羽蓋驂龍帝子還縹緲遐蹤遊物外淋漓醉墨落人間
九天步武尚書履應與壺公接佩環

湛上人鍾秀樓詩樓在四明東湖上

百尺樓居聳碧霄天開圖畫足逍遙一帆春雨來湖口

兩岸青山落樹腰
夜坐翻經香欲冷
詩成倚柱酒微消
東還擬遂登臨興
慚愧無才趁早朝

蕭執子所

廬陵人

劉子高贈王明善依韻以和

匡廬之山瀑布泉
老子結社來何年
林間經罷常隨鹿
雲外樵歸或遇仙
坐石有時巾掛樹
焚香終日袖攜烟
市南別有秋江水
種得花開總是蓮

綠筠軒為姚宰作

綠筠陰陰翳牕戶此是姚侯讀書處搖空翡翠晚宜人
食實鸞凰曉相語稚子牽衣惜春露候卒編籬護秋雨
何當便棄人間事抱琴走覓湖山住

次荅劉汝弼見寄之什時汝弼客德慶侯第

春事今餘幾花枝已不多向人愁作客思爾積成痾威
鳳翔高漢慈烏戀舊窠平津東閣好早晚定相過

張孟兼

字同金華人

春夜學宮宴集以春宵一刻直千金分韻得一字

良夜款橫宇，髣几散芳帙。秉燭延餘光，焚蘭發清苾。於
馬衆彥并，遽爾百憂失。交深固金石，情洽契膠漆。睽茲
蕭爽地，際此休明日。皇風既遠被，遙觀四海一。

送宋仲珩省母歸金華

朔風歲華晏，遊子去京國。為言省慈母，念念忘寢食。山
川雖云遠，何敢憚匍匐。客懷畏別離，令我忽悽惻。我家
子同里，近在南山側。相去一舍間，况是素親識。往者各
家居，朝夕弄文墨。時常子來過，暫離輒相憶。自期韓孟

交叩難惟籍湜子才實超邁字畫更奇特夙多臨池功
揮灑雄筆力豈獨鍾張輩可作當代則比來接搢紳容
度彌整飭恍如雜葩卉方春競顏色顧我絆微名窮巷
歎偏反果非子慰藉何以洗胸臆笑語每移時欲去必
腫黑固知千里外此樂不易得子今遽去我而我心轉
盡辭親四寒暑未得供子職近雖道路通半載無消息
便當從子歸恨不生羽翼

送朱仲雅經歷赴任浙江

人生託交遊所貴在有道朱子西江賢一見相傾倒維
時奉明詔編書共論討剪燭清夜間遂得罄懷抱越茲
僅一載過從每情好今晨來叩門告別何草草為持紀
綱地振理實繁浩西州風俗媮君去宜再造必若救瘡
痍蝨賊期盡掃明主憂黎元到官須及早仲冬草木凋
風霜肅晴昊遠別令人愁此心慙如擣

送鄭叔車

鄭子離襁褓所怙惟乃父父昔仕燕京半生去鄉土子

家孝義門十世居同聚派衍白麟支望出滎陽譜庭常
無間言禮或習鄒魯雞鳴起盥櫛合食聞鐘鼓雖當喪
亂後遵訓仍厥祖我家故同邑匪聞目親覩况子吾素
知才華足多取豁落義氣俱歔唾珠璣吐揮毫走蛟螭
作賦凌鸚鵡昆弟既謂賢親鄰亦稱數久欲尋父去奈
時方用武消息十年無道路滿豺虎近傳燕薊平不覺
喜而舞聞父已南還恨不身挿羽歛衣即登途宵進江
上艣忘食并兼程亦不避風雨逾旬及南京適父病將

愈逆旅會面歡勝渴飲酥乳比鄰走翁嫗環視立如堵
我時往相見政值日卓午挽之入客邸共談坐揮麈問
言念父情情深話覩縷知子之所經跋涉甚辛苦春泥
膏土脈停雲黯天宇朝行履濡露暮宿定林莽我惟純
孝者往往見前古名同金石堅不與草木腐事親在娛
樂奚必養三釜羨子為此行於世豈無補聞者大驚奇
見者輒誇詡人生斯足榮何用效題柱是言良已解口
荅頭屢俯陋予亦胡為問學本狂瞽三年事佔畢竟日

拘訓詰環列紛叩難類敵張勁弩內顧實空乏畏彼搜
林斧幸哉措紳交脫略噲等伍或時卧養痾連月不出
戶今日子來別省墓亟東下為言奉父命明發河之滸
此還暫當來寤寐歌陟岵聞之觸鄉思慨嘆髀頻拊吾
翁髮垂白不得躬幹盞便欲從子歸致身學稼圃敝廬
南山中風物詫常杜桃李自滿蹊去天纔尺五但見桑
麻榮豐年多黍稌昨宵夢先隴松楸長栩栩強起訴此
懷喚僕買清酤春風吹柳條夜雨漲江浦勸子盡一觴

聊以寫心腑

予友陶本中與予先後來京予來時本中為奉新簿已二年適以公事至聚首一日即去嘗示予近詩數首曾未幾何有自江西來者則云本中死矣噫豈文字之交而遂絕於斯耶予交本中情好之篤雖弟昆莫過今死矣而欲不哀得乎因為哀詞一章書其詩後以誌予悲

今晨開篋笥得子前日作攬之不忍看但有清淚落昨

者客來過云子已冥漠始聞罔所信終乃大驚愕飯食
不能食使我懷抱惡慟哭天為愁春風亦蕭索去年見
子時大雪被城郭歲晏復東西彼此歎飄泊何期聚散
後生死竟難度緬思故山日文字得酬酢或時中夜舞
擊劍起揮霍自期古人儔流俗已脫略焉知出處輕身
世隕風籜百年金石交一旦付綿邈重山烟草深白骨
定誰託投涕一題詩聊踐平生約

漫興

梨花半開夜雨催無奈
李花如雪堆門前
美人不見來
東風楊柳吹千迴

青驄驕嘶金鞵銜美人
二月裁春衫
江頭麥秀青蘄蘄
西湖放船開錦帆

義門鄭仲舒先生得請歸浦江
予於先生同里且
親故賦是詩情見乎辭矣

鄭公去年離北平
束書抱病來南京
城隅解后喜且驚
開顏握手言再生
自從南北屢構兵
日夜悵望鄉關情

幾回寄書鴈南征中心搖搖若懸旌苦遭喪亂百病嬰
客邊囊橐一旦傾此來四顧徒茆茆豈料吾子與合并
我時聞之涕泗橫况公素有文章名居官勝國職最清
經筵之擢轉庠黌及當玉署已宦成又為奉常典樂盛
人生際此自足榮但恨白髮已數莖懷哉屈子全忠貞
誼與日月同光晶願言夕食秋菊英佩明月璫紉芷蘅
懸河之論春雷轟使旁觀者顏發頰索居半載留帝城
坐聽夜雨哦寒檠眼前倏忽時變更春風一見衰草萌

公家孝義好弟兄
遣兒千里來遠迎
乃今得請荷聖明
身若插羽乘風輕
過門云別明遂行
開船要趁蒸雨晴
夜久不寐視長庚
長庚欲落鐘鼓鳴
庭樹喔喔聞雞聲
薊緄起舞冠絕纓
公歸我愁絲亂縈
亦有夢寐懷先塋
如過吾父款柴荆
為言恨不同趨程
終當早晚乞歸耕

蓮房聯句

宋璉張孟兼高啟

露冷鏡湖秋

宋璉

波涼練塘曉盤翻綠雲稠

孟兼

錦破朱霞

少新苞顆微綻

高啟

餘葩莖尚嫋瘦繭綴寒蠶

璉

尖喙啄

欽定四庫全書

卷五 雜詩 正音

青鳥下唯玉龍眠

孟兼

中有瓊絲裊擎重柄欲折

啟

含深

晴尚宵

璉

孤懸類覆杯

孟兼

雙立疑擢表

啟

初成欣雨滋

兼漸老怯風掉

啟

多子同根榮

啟

獨婦專房悄

璉

粧卸

失娉婷

啟

歌來逢窈窕

璉

剖心效諫忠

孟兼

並頭呈瑞兆

啟裒蹄密竅剗

璉

魚目微光皎

啟

珠珥落繁多

啟

瑤軫

貯囊小

璉

空實外莫辨甘苦中自了

啟

剝淺星滿池採

盡香餘沼

啟

雕筵釘戢戢玉虫攢擾擾送看出小艇薦

喜對清醪

孟兼

新嘗勝江芡遠覓迷水蓼褰芳想夏初

啟

感物傷秋杪

孟

聊茲發吳詠一笑烟水渺

璵

北山草堂

草堂卜築近嶙峋怪石蒼苔迹未陳
澗瀑亂鳴前嶂雨山花遲發半岩春
每逢過客畱題壁自有居僧為卜鄰
松下茯苓令亦大可能謀食樂終身

金華洞天

洞天萬仞落空翠神仙何年上青霄
蛟龍已去荒窟宅雞犬無聞遺鼎瓢
冰湍洒洒暗猶落巖雪陰陰春不消

我欲乘風問生術林間黃精深雨苗

登聚寶山分韻得春字

蹤跡憐身拙登臨縱目頻江山如好客花鳥故餘春
落行藏異悠悠歲月新數莖初白髮朝夕為思親

春日遊鍾山以溪回松風長分韻得長字

訪古來鍾阜尋僧問草堂千年猿鶴靜一逕石林荒
泉落春冰細梅留臘雪香鄉心憐薄暮矯首碧雲長

高啓季迪

姑蘇人

聖壽節早朝

天啟聖圖昌流虹叶夢祥飛龍起江左戰馬放山陽宮
柳垂閭闔仙桃熟建章遠人陳貢篚近侍挹爐香金鏡
千秋籙瑤池萬歲觴小臣歌拜手舜日正舒長

甘露降宮庭栢樹

和氣融為液中宵降碧天光溥高栢上瑞發內庭前見
日朝還泣經風晚盡堅芳穠蜂蜜滑的皪蚌珠圓厚澤
歌難喻沈疴飲易痊願言推聖德濡沃遍周埏

擬古四首

纂纂牆下李芄芄陂中麥浩浩望遠途悠悠思行客客
行歲已盈紆鬱傷我情始知失羣鴻不若求友鶯登山
知天高臨流識川阻不遣懷同心那知別離苦別離不
可久寂寞不可守自傷紅顏子相思成皓首朝日如不
晚行人會當返

嵯峨雲間樓俯視層城陰綺戶相洞開清飈拂羅襟上
有離居婦哀歌撫絃琴不知中怨誰掩抑一何深初為

郢中唱再奏邯鄲吟不惜努力歌寫作絕代音風吹落
君耳萬里知愁心曲盡思寂寞青天日西沈安得化彩
鳳飛去巫山岑

美人一相見遺我白玉環上有雙雕龍遊戲在雲間持
此感深意佩結無時間玉以比貞潔環以明不絕雲龍
永相從誰能使離別

明星爛東方北斗亦已旋獨宿悲夜徂空牀藉蘭荃雞
鳴整環珮思奉君子筵君子行未歸新粧為誰妍意疎

覺去遙咫尺越與燕含情乏形管何以寫中虔君如綆
上瓶妾如井底泉不垂汲引患澄瑩徒終年

堂上歌行

堂上歌歌南山主人為歡仰客顏翠帷夜卷出兩鬟移
樽更飲花樹間花樹間有明月客不醉歌不歇

贈金華隱者

我聞名山洞府三十六一一靈蹤紀真錄金華秀出向
東南遠勝陽明與勾曲樓臺縹緲開烟霞天帝賜與神

仙家靈源有路不可入但見幾片流出雲中花子房之
師赤松子三千年前亦居此飛蹤恍惚誰解尋謾說至
今猶不死松花酒熟何處遊瑤草自綠春岩幽羣羊卧
地散如石老鹿耕田馴似牛聞有隱君子廼是學仙者
自從入山中不曾到山下世人莫識其姓名以山呼之
不敢輕樵夫忽見苦未識只疑便是黃初平嗟我胡為
在塵網遠望高峰若天壤茯苓夜煮儻許食鐵杖來敲

石門響

孫賁仲衍

廣東人

期羅浮蕭鍊師不至

石室松桂秋涼風滌殘暑柴門敞空曲曠夕懷仙侶巢
笙久不至鶴馭今何許朗月流清輝山中幾延佇

寄琪林黃道士

雨絕天景佳前榮樹光綠遙憐採芝侶遠在春山曲琴
歌久已斷酒賦何由續有約今夕同開樽掃茅屋

南園歌寄王河東彥舉

昔在越江曲南園抗風軒羣英結詩社盡是詞林仙南
園二月千花明當門綠柳啼春鶯羣英絡組照江水與
予共結滄洲盟滄洲之盟誰最雄王郎獨有謫仙風狂
歌放浪玉壺缺劇飲淋漓宮錦紅青山日落情未已王
郎拂袖花前起歡呼小玉彈鳴箏醉倚庭梧按宮徵哀
絃泠泠樂向終忽看華月出天東裁詩復作夜遊曲銀
燭飛光如白虹當時意氣凌寰宇湖海詩聲萬人許酒
徒散落黃金空獨卧茅簷夜深雨分飛幾載遠離羣歸

來城市還相親間來重訪舊遊處蒼烟萬頃波粼粼波粼粼日將夕西風一葉凌虛舟猶可題詩向青壁

羅浮歌寄洛陽李長史仲修

亭亭西樵峯宛在南海湄日華麗仙掌影漾金銀池我昔扁舟縱長往凌風浩蕩烟霞想幽尋更欲探神奇復向羅浮事仙賞仙家三十六洞天羅浮莫與滄洲連丹霞射影四山靜羣真環珮來翩翩藥珠之峰數千丈君時與我緣蘿上水簾直下飛晴虹萬壑天風度流響山

中劉郎司玉臺仙書授我琅函開心如明月炯虛照身
與浮雲同去來此時會合那能再塵土分飛忽三載我
行奏賦登金門君亦乘輅度淮海淮海迢迢烟樹深相
思歲晚結愁心晴天萬里碧雲遠何由一寄還山吟山
中洞房春寂寂山中之人長歎息松花酒熟人不歸瑤
草東風幾回碧

宋璩仲珩

金華人

採桑曲

桑芽露春微似粟小姑把蠶試新浴素翎頻掃細於蟻
嫩葉纖纖初上指朝採桑暮採桑採桑不得盈頃筐羞
將辛苦向姑語妾命自知桑葉比家中蠶早未成眠大
姑已賣新絲錢岸上何人紫花馬却欲拋金桑樹下

春夜詞

春閣凝溫翠雲繞五色流蘇垂嫋嫋美人自睨玉花鈿
子帳香棲綠衣鳥銅鳧漏聲夜初墮紅暈搖晴燃蠟火
欲寄相思無鯉魚月色梨花愁朶朶謾將軟帶結同心

開簾微步鞦韆陰芳眠未穩鴛鴦枕早樹重重啼翠禽
寄章允載兼柬項思復

憶昔到京畿與子寓官廨一見即相驩不翅舊交快維
時困道途驅車久行邁忽逢弛擔初欣若身脫械握手
坐矍鑠軟語慰疲憊情投比黏膠意愜甚搔疥項君數
過予滯下喜方瘥三人互談噱何殊合糾繡驂鑣出游
衍古蹟探竒怪路入青蓮宮駐足聽梵唄薄晚始旋邸
傾倒形忘瘵周詳論書譜從容說詩派凡習尚浮華遺

音日已壞作者固繁夥成韶混夷韎瀾倒并波隨疇能
掄危敗顧予樗散材頻年處卑隘枘鑿乖方圓甘遭世
俗賣人將競嘲譏子乃敷教誡苦言加箴規默默使心
解酒酣示新篇詞源極滂湃却類任公子投竿下羣牯
應知藝嘉禾薈治絕梯稗讀之神駭驚秋蛩罷嘶喝政
圖藉薰陶別還隔遙界欲叩寢食安但復占爻卦浦汭
守衡茅無從豁矇瞶譬諸鐵在爐伊誰鼓風鞴况乃患
沈痾軀命猶纖芥侵尋閱暑寒孱弱之剛夫精神盡凋

耗面目多腫噲布衾暖閣眠藥貼晴簷曬年來獲告瘳
書齋仍掃灑猿鶴亦爭慶似索烟霞債綴賦詠雕蟲攻
篆學垂籀有時看飛泉四山寂無吳思取古遺經一覽
適灸囁蘭膏繼日晷矻矻警昏懈視已常欲然進業慙
質竄志須成絲枲未能脫管箴篤信宴安中懷毒劇蜂
蠆蚤暮自深省此語諒非僞近聞子亦歸親朋樂情話
千里感貽書殷勤馳一介而翁幸康彊愧缺牀下拜執
簡立臺端百壬不敢噫道迷竟莫前動若飛翮鍛歲月

無停輶季秋修己屆籬菊傍雲肥江山日如畫軒車幾
時來夜雨一燈掛明德正可崇相期各云勸

劉仔肩汝弼

鄱陽人

遊仙詩二首

登冶城山作示張玄
德道士戈仲京徵士

神州闡佳麗冶城閔玄虛琳宮際霄漢綵閣臨天衢肅
肅神響集泠泠祥飈俱要眇引鳳吹飄颻曳霞裾陵陽
與服食安期共興居左覽金匱記右抽鴻寶書鍾山足
靈草涎池多白魚永言駐精魄為結義和車

靈境啟赤縣丹臺麗璇霄虛樞洞宏敞飛閣凌蒼堯倒
景返曜靈玄靈散祥飈鶴駕儼驂馭霞佩紛招搖青鳥
引翠蓋瓊娥合仙韶飡和宜殤顏飲玉皆松喬上壽安
足喻千齡等崇朝脫屣九垓上後視三光凋

贈張時敬還荆南

隨牒適荆土倦遊滯京畿謀生苦拙訥事與心恒違朋
儔一疎濶山川復間之音問曠莫達何為遽來斯世故
有變遷歲月成推移顏藻減丹渥衣塵化為緇稍欣披

雲霧復覩聯珠璣意恆苦不早情深發彌遲夕語厭促
漏晨遊恐斜暉論舊已慨歎况乃重乖離春草滿南浦
時花匝郊圻乖人無為歡感物悲路歧昔別已三載重
來復何時幸茲書軌同遠邇無不宜逸足志四海羈禽
戀故枝言念屬繁翰聊以叙所私

登北山

薄言出東郭縱步陟北嶺油雲冒峯壑寒松雜修挺林
翳景若暝谿迴路猶引崇基擬素志澄淵鑑清影遵險

既易常臨深亦逾謹朋遊並登眺妙趣心獨領寄想烟霞濱超然欲歸隱

題朱氏篁谷

蘭澤蔽宿草椒丘無餘芳
暎茲淮陽谷懿彼多修篁
雨葉偃翡翠風梢亞琳琅
幽人感歲暮托蹟同雪霜
曾謂白駒至載覩鳴鳳翔
神慮紛蕭散遐心信徜徉
寤言契斯樂永矢不可忘

題國子生桑懋思勤齋卷後

去日忽已速來日亦不停念彼自修士惕然動中情宴
安豈可懷華耀非所營升堂服師訓旁構羅羣經投迹
謝塵軌焚膏繼朱明於焉肆探賸所冀業日精竊求顏
生志載慕殷湯銘夙夜苟自勗此篇其可徵

春日與李二文學遊城南

浩蕩關河遠周流歲月新獨醒愁對酒多病怕逢春梅
柳南城路鶯花紫陌塵若為聯騎出為爾謫仙人

公子

玉雪諸公子聯翩出鳳城
柳橫絲障綠花擁繡衣明玉
勒迴香騎金丸落小鶯
晚酣邀上客歌吹向蓬瀛

得鄉書

鄉書不忍看憂緒每多端
鶴髮慈親老鶉衣稚子寒
園田多撥棄耆舊半凋殘
朝夕東歸念雲山正渺漫

別墅晚晴與鄰叟久立

郊原初雨歇散步出荆扉
落日在高樹涼風生客衣
佛香僧舍近江影塞鴻飛
亦有南鄰叟忘言相與歸

夜讌

上相勲庸盛，羈人會合難。昔曾陪劍戟，今乃廁衣冠。酒
向佳人醉，花隨錦障看。篆香凋鴨換，銀甲小箏彈。內座
開新色，重簾護薄寒。旨肴呈海陸，妙舞播椒蘭。賢達儕
梁苑，才華擬建安。任情從客狎，劇飲樂杯乾。門第青春
迴，星河五夜闌。歸鞍拂華薄，零露已漙漙。

春曉曲

紫絲複帳流蘇結，雲母屏風疊香雪。門前嬌柳乳鴉啼，

暖漏丁丁曉將徹花枝入簾紅尚小蘭露著衣香不歇
江南行客歸未歸芳草春風滿城闕

鳳臺吟贈王道士

我昔慕仙侶東遊求蓬萊朝辭黃鶴樓暮憇丹鳳臺鳳
臺高高入窈冥恍若玄圃開神京陽烏顧兔耀光彩銀
臺金闕同崢嶸其陽生梧桐其陰出醴泉榮光休氣集
九仞鳳凰一鳴三千年客有王子晉聞之棄緌山時來
鳳臺上吹笙月明間我將從之弄明月了然便覺心神

閒且為鳳臺吟復和鳳臺曲願隨鳳臺人飄飄跨雙鹿
昨日麻姑海上來為言海宇無氛埃蟠桃再結金丹熟
相與翺翔凌九垓

荆南江晚眺有感


沙頭寂寂晚維舟詞客重來感舊遊江上夕陽諸葛廟
雨中芳草仲宣樓天連錦水來春色雲暗襄陵起暮愁
回首可憐梁甫意一官牢落向南州

題李宗伯所藏趙仲穆墨蘭

瑣牕春晝寫蘭亭獨愛王孫骨氣清何事花前雙蛺蝶
飛來羅袖最多情

望闕口號

閭闔排雲寶殿開千官鵷鷺早朝回不知誰獻王褒頌
得奉君王萬壽杯



雅頌正音卷五